

Residencia Veneranda awor cu un acuerdo pa rescata e propiedad

Dialuna mainta a firma un acuerdo oficial pa rescata e edificio Residencia Veneranda miho conoci como ex Papiamento Restaurant. Minister Oduber ta reconoce cu ta trata aki di un edificio, un cas cu un historia particular cu a pasa di generacion pa generacion di e famia cu tabata biba aden.

Un famia cu a haci hopi trabou pa percura pa e origen di e cas por wordo manteni mas cu ta posibel, a pesar di e cantidad di añanan y incidentenan cu a percura pa un decadencia hopi grandi di e edificio. Un edificio memey di nos centro di ciudad caminda nos bishitantenan por mira esaki, pero mas cu tur nos propio hendenan cu ta recorda e balor di e propiedad aki, di tur locual e la significa den historia di nos isla. Den cuadro di e desaroyo di revitalisacion di nos centro di ciudad tin un atencion special pa maneho di nos monu-



mentonan. Minister Oduber ta comenta: "Na momento cu mi a asumi e responsabilidad, nos a expande e vision y posibilidadnan pa cu e maneho di monumentonan riba nos isla, di con por rescata y mantene pa percura cu e joyanan aki cu ta parti di nos historia no bay perdi. Cada un di e edificionan, no solamente pa e balor di arkitektura cu nan tin, pero tambe cada edificio cu tin asignatura cu ta forma parti di ta considera un monumento, tin un histo-

ria hopi bunita y rico su tras cu nos kier percura cu esaki keda manteni tambe. Esaki ta un cu sigur nos ta mira cu tin un balor hopi grandi."

A inicia cu e proceso casi un año pasa na un forma hopi intensivo, despues di varios combersacion cu e famia, despues cu por a mira varios incidentenan no desea pa e propiedad, porfin awor ta yega na un solucion. Ta firma un acuerdo entre Monumenten Fonds cu famia

representa pa Sra. Landa Ras-Merryweather. E acto a tuma luga memey di yiu, nieto, bisa nieto y te hasta tata nieto cu tabata t'ey presente pa demostra e historia bibo y sentimentonan fuerte pa cu e edificio aki. Como un famia asina grandi no ta facil pa tur bay di acuerdo cu un pensamiento pero Sra. Landa a logra esaki. Cu un rapport di baloracion hopi mas halto, e famia a tira awa den biña pa por salba e edificio pa comunidad di Aruba.

Minister Oduber agradecido na e famia ta comenta "E meta principal ta cu nos ta rescata un edificio cu un historia asina rico pa locual ta trata informacion y locual e la significa den pasado, tambe pa esunnan cu a biba den e hogar aki pero adicional na tur esaki pa e totalidad di restauracion cu ta tumando luga den nos centro di ciudad." E acuerdo ta un principio cu ta duna e opcion primordial na Monumenten Fonds



pa por yega na un acuerdo di compra di Residencia Veneranda. Ya caba a cuminsa delibera riba e futuro uzo di e edificio cual no ta defini ainda. Sr. Oduber ta enfatisa y finalisa bisando: "Locual si ta defini ta cu kier restaura e edificio, kier restaura den su forma original y percura cu traves di Monumenten Fonds e haya e miho uzo cu por tin den e futuro nos dilanti. Nos ta salvaguardia historia, nos ta salvaguardia locual ta di nos, nos cultura, pero mas cu tur cos nos ta preserva pa nos por traspasa pa nos futuro generacionnan." □